


Benjamin Romero ta presenta su di tres buki

E virus misterioso



AUTOR Benjamin Romero ta publica su di tres buki, titula: ‘E virus misterioso’. Un obra manera Benjamin mes ta bisa “*cerca di su curason*” y cu ta nifica hopi p’e autor.

Un obra cu un tema actual, e ta trata un topico cu nos tur ta bibando aden. E pandemia cu ta trece reto pa mundo.

Diferente topico di e desaroyonan di e pandemia ta bin na ordo. E autor ta explora tambe e parti humano, bon y menos bon, pa medio di e personahenan. Tambe moralidad y otro balornan ta puntonan cu e ta trece padilanti.

Benjamin Romero a tuma un aña di tempo pa traha riba e obra aki siguiendo e desaroyonan di e pandemia y e reaccion di e individuo como tambe di e comunidad.

Romero ta caracteriza su publicacion mas recien como un novela cortico cu tin su dimension di ficcion, pero como cu e ta un periodista e tin tambe partinan realistico y tin bes e dos estilonan aki ta mezcla den otro.

Sr. Romero a entrega 2 ehemplar di ‘*E virus misterioso*’ na Directora di Biblioteca Nacional Aruba, sra. Astrid Britten p’e coleccion nacional. Biblioteca lo busca mas ehemplar p’e tin disponibel pa prestamo na publico.

Biografia cortico

Benjamin Romero a nace na Aruba dia 9 di mei 1963. El a realisa su estudio escolar y universitario na Colombia, pais di origen di su mayornan. El a gradua como *Comunicador Social y Periodista* na Universidad de La Sabana na Santa Fe de Bogotá, Colombia.

Despues cu el a gradua, Benjamin a establece su mes na su isla natal, unda e tin mas cu 25 aña trahando den prensa. Actualmente e autor ta traha como periodista y den redacion di e corant *Bon Dia Aruba*.

Na aña 2016 Benjamin a publica su prome buki, ‘*E Negoshi di Koffie na Aruba*’, cu a bira un *bestseller*. A imprimi dos edicion di e obra aki na Papiamento y un version na Ingles [Titel na ingles]. ‘*E Caya di Monche*’ ta titulo di su di dos buki, dedica na e linguista Ramon Todd Dandaré den cuadro di Aña di Papiamento 2018. E obra aki na Papiamento tambe tin dos. Ambos ta obtenibel na biblioteca.

Fecha di e publicacion nobo aki ta april 2021, cu ISBN 978-99904-69-76-9 (103 pagina). Linguista sr. Ramon Todd Dandaré Mag. Ling a haci coreccion.

Benjamin Romero lo duna diferente presentacion di su buki den e proximo dianan. E buki ta na benta na libreria Van Dorp.